

– Բժշկապետ Քարլ Ռիսման, – ներկայացրեց իրան Ասլանը, յետոյ ծանօթացրեց մեզանից ամեն մեկին:

Նա նստեց քահանայի մօտ եւ, դառնալով դեպի ռեսը, ասաց.

– Լաւ հիւրեր էք ունեցել: Ցաւում եմ, որ չհասայ ընթրիքին:

– Շատ սպասեցիք ձեզ, Աբգար ախպար, – պատասխանեց ռեսը, – ինչո՞ւ այդքան ուշացաք:

– Գիտեք, էլի՛... Երբ ես հովիւների մօտ եմ գնում, ամեն բան մոռանում եմ... նրանք էլ ինձ համար մի գառն էին մորթել, – պատասխանեց նա, աշխատելով սառնասիրտ ձեւանալ, թէւ նրա ձայնը զգալի կերպով կոտորատում էր սրտի յուզմունքից...

Նա դարձաւ դեպի Ասլանը.

– Ներեցեք, պարոն բժշկապետ, իմ անտեղի հարցասիրութեանը, դուք ի՞նչ դեպքով անցաք մեր լեռների այդ խորքերը: Մենք խիստ հագիւ անգամ եք պատահում այստեղ եւրոպացիների:

Ասլանը պատասխանեց, որ զանազան ուսումնական նպատակներով ճանապարհորդութիւն է անում. նրան հետաքրքրում է այդ կողմերի հնութիւնները, բացի դրանից, ցանկութիւն ունի ծանօթանալ այդ երկրի լեռնաբնակների կեանքի ու սովորութիւնների հետ, եւ շատ շնորհակալ կը լինէր, եթէ պարոն վարժապետը կարելոյն չափ օգնէր իրան:

– Մեծ ուրախութեամբ, – պատասխանեց վարժապետը, – ես բաւական ուսումնասիրել եմ թէ այդ երկիրը եւ թէ նրա բնակիչներին: Ես պատրաստ եմ իմ նկատողութիւնների տեսորակը ամբողջապէս ձեզ ընծայել, դուք կարող էք նրանից օգուտ քաղել:

– Շատ շնորհակալ կը լինեմ, – պատասխանեց Ասլանը, – ի՞նչ լեզուով է գրած:

– Հայերէն:

– Այդ ոչինչ, ես թարգմանել կը տամ: Բայց ինձ համար աւելի թանկագին կարող էին լինել ձեր բերանացի տեղեկութիւնները:

– Այդ մասին կը խօսենք, շատ կը խօսենք, ես, որքան կարող եմ, բաւականաթիւն կը տամ ձեր հարցասիրութեանը: Դուք դեռ երկար կը մնաք մեզ մօտ, պարոն բժշկապետ, մեր գիւղացիների ձեռքում երբ մի օտար հիւր է ընկնում, շուտով բաց չեն թողնում:

– Շնորհակալ եմ: Բայց շատ ցաւում եմ, որ երկար մնալ չեմ կարող. ես առաւօտեան պէտք է ճանապարհ ընկնեմ: